

57. Nu ngiy ñaan Yàlla bayyi la feek njaboot geek
Jullit ñépp ndax nga dekkal xolyi wéét naa
58. Nu ngiy ñaan Yàlla boole njaboot gi ciw yiw
Defal nu ci fépp fu nu jëm am lamaanaa
59. Dimmal nu ba képp koo gis muy saxoo naa,
Alhamdu li Laahi Rabbil aalamiina
60. Saxal nu ci diiné mey nun koom te bañ noo
Natoo cik beew wallak ñakkaak di sonna
61. Ilaahii noo gi lay ñaan sax ci liimaan
Bi jaai Imaami Laahi sàngub jamaana
62. "Salaatu Laahi zumma salaamu Rabbii
Alal muxtaari xayril aalamiina

BISMI LAAHI RAHMAANI RAHIIMI

"MARSIYA" SEYDINA MANJOON LAAY" 1970.

1. "Alhamdu li Laahi Rabbil xalxi" ciy dogalam
Li Yàlla def ci mbindééfam loolu moo wara am
2. Dogal ba jiitu na cib jaamam lu jëkk mu am
Atteem ba ken manu ko soppat ba tee ka mu am
3. Nan gëm te jël mbir yi jébbél Yàlla koon du nu juum
Te bañ di mer ak di tiit Yàllaay ki def li fi am
4. Moo tax ñu wommatu cib atteem ci jël gi mu jël
Seydina Manjoon Yàlla na féeroók yërmëndéék ngërëmam
5. La jël si Yonnent xayrul xalxi-koo ka du bàyyi deek
Ku am baken fii ci dunyaa yeefar ak ku di gëm
6. Ka jël si baayi Rasuulu Laahi Seydinaa
Du bayyi baayub mbindeef muy béél ci dun bi di dem
7. La yóbbu yaayi Rasuulu Laahi "saafihinaa"
Du bayyi kenn ndeyam sax fii di béél baña dem
8. Dunyaa dadul kër nde koon kay Yàlla Buur bi du def
Xayrul waraa ñëw ci dunyaa fii di doon ku jirim
9. Nan seet ci Yonnen bi ci tiis woo xamni dal na nu koon
Di nay oyof lu mu réy ndéém da noo ame ngëm
10. Yàllaa ne roy leen Rassulu Laahi roy gu rafet
Mbooleem ñi gëm Yàlla tey yaakar ci bés ba nu jëm
11. Adina yaa di kërub wor kay nde koon di nga yor
Rasuulu Laahi ba nu gis jëmmëm ja ak kanamam
12. Koo xaritoool ak mujjam cim kan nga kay xala sóób
Mu rééré ak neen bu fekkul woon mu wóólu te gëm

13. Jayoon nga Firhawna tax kaa beew di bàkku ba naa
Mooy Yàlla waayek mujam mooy alku mook ku ka gëm
14. Namroos ma daan jéema xeexak Yàlla yaa ko jayoon
Ba tax na koo béél ca sijjin yuux ga dootu wedam
15. Aad ak Samood ak boroom ñay yaak ña topp ca ñoom
Ñii ñépp yaa leen jayoon ba tax ñu sóóbu jahiim
16. Yonnentaa yee ñi la xam, moo tax ñu dëddu la jéék
Loolo taxoon Mustafaa daan xiif bay tayley mbubbam
17. Maa yéem kerook ba Rasuulu Laahi Seydinaa
Làxxo te dem "Ilayiin" céy àdinaa ka lëndëm
18. Mbooleem saaba yu mak yépp jaaxle, ñee nga lafañ
Ñaa luu ngireek tiit mu réy lammeñ wa far na wedam
19. Ñaa bocci jaasi te naan ku amu fit ba di wax
Naa Mustafaa dee na nii ma dal di jël bàkenam
20. Sadiixa ñëw seet Rasuulu Laahi Jël kanamam
Tek ca kanam ga di jooy te naa ko teey nga ba dem
21. Yaa teey ci sak dundë céy yaa teey ci dem gi nga dem
Yonnen bi wéétal nga dunyaa moo fu nuy xala jëm
22. Mu dem ca nit ña ne leen "àxan" lu neexul la am
Ndé Mustafaa dem na Yàllaay Buur bi dul mosa dem
23. Mu daldi jànga "wa maa Muhamadun" ba ca "saakiriina"
Yow Umarun seetal sa xel ci li am
24. Bésab kerook dootu am aw tiis wu mel ni kerook,
Ku nekk war na ko seet ci tiis wu dal ci kërëm
25. "Innaa li Laahi" Yàllaa moon jaam ñi ak la ñu am
"Innaa ilayhi" mbindééfam du ka raw fa nu jëm
26. Nu ngiy dëgër lu di baaluy gëm, di jéggëlu ngir
Demuk Manjoon dafa tiisoon xol yi wóólu te gëm
27. Bésab kerook bañu nee Seydina Manjoona, fi jók
Ku xam Manjoon xam palaasam tiit na xol ba gëlëm
28. Ñélée di wax naa Laayeen kay tasna ngir ga dunduk
Seydinaa Manjoon rek teewoon ku ne topp njiwam
29. Dépees ya daw telefon yay riir di yëklé, ku ney
Jooy baay Manjoon mu lewet ma, làxxu wéy fu nu jëm.
30. Mbooleem fu diy tunda mba ab gox ci biir Senegaal
Ñépp nga naa mbir mu réy moo am ci Yoof na nu dem
31. Sëriñ sa teew na kerook àndak muxadam ya ak
Seex yaak njaboot ga ku nekkay jotalim ngërëmam

32. Waa nguur gi yónnée ci biir “serwiis” yi naa ñu dem
Tey teewe xewxew ba am loolu moo wara am
33. Ministërak dipiteek góornóor ku nekk taxaw
Di wax jalórey Manjoon mi réér mbindéef yi ba dem
34. Ñělee nga boolo di ñaan ndax xol yi ànda ci yiw
Ñěléé nga wéét di xelaat ngir jaaxle naa fu nu jëm
35. Ña not ca mboolo ma seen xol tiit na ngir ga ragal
Juuyoo gu am waaye soobul Yàlla loolu mu am
36. Al haaji Ablaa ya leeral xol yi ker bamu nee
Wii yoon ku fiy mak la ñuy wormaal mu jiitu nu dem
37. Loolu la Baay Laay mi fentoon yoon wi diglé te moo
Fi sax bu leen juum ba tax ngeen aw fudul fi mu jëm
38. Dibéér ja jëkk ginaaw faatub Manjoon la ka leeral
Xol yi yép di bék mboolo ma ñaan di gërëm
39. Ku nekk naa Abdalaay yaa am teraanga te am
Ngor yal na Buur Laahu jox lam ndam ci foo mana jëm
40. Ma wax tuuti ci “taarixub” Manjoon mi nu doy
Te doy Limaamook Isaa ak Yàlla Buur bi nu gëm
41. Atum junnéek ñetti tééméér moo di “mawliduhu”
Ba at ma dëlsée la Baay Laay feeñ mu daldi ko gëm
42. Limaamu nee ñetti ruu ñoo jëkk gëm ba mu fééñee
Ruu wu Seydinaa Manjoon moo leen ñetteel ci lu am
43. Amoon na “Xaas” ci nanguk ñaan loolu kay dafa am
Jàngal “jawaab” ba Sëriñ Dun binda koon di nga xam
44. Buur Yàlla mos na ko won mbóótam xilaafaam mu xéy
Xibaar ka Baay Laay, mu naakaa loolu faw di na am
45. Te loolu Yàlla da kaa won weer wi ak janta beek
Bidiiw yi yépp mu ramaas leen def ci ab misetam
46. Mbooloo ma dar ka te naa kaa yaa nu doy mu ne leen
Nun ñépp nan topp Isaa moo di mak ji ma gëm
47. Te loolu feeñ na ba Baay Laay nelawee te ñu nar
Rob Maam Libaas te Isaa teewul ñu jot ndigëlam
48. Manjoon na daldi taxaw yor jaasi naa ku ci rob
Baay Laay te Seydina Isaa teewul dundaam di na yam
49. Topp na Isaa magam ñeen fukki at yu kamaal
Te mosula yoxyoxi mbaa muy yoxat ci diir ba mu am
50. “Fi sannati” hasasin” (1368) la jot xilaafa ga neel
“sasun” (67) la tollu ci ay at boo ba nee mana am

51. Jot na ak xilaafaam ci ak mak loolu moo waraloon
Daawul faral di tukki ak di wër di seet fu mu jëm
52. Daawul wëreelu di laaj ay àdiyaaki alal
Ku doyluwoon la du tiisal ken ngir ak alalam
53. Moo sell, moo amewoon ngor, ak teraanga, te moo
Am yërmandé ak mbaax, te laabiir, yii meloom la yu am
54. Boo ko mosaan gis mu naan leen gaayi ngalla bu leen
Sàggan di fátte li leen fi taxa ñëw di ko gëm
55. Moo ame woon muñ te bañ nemmat ba loo ka defal
Mu jéem la koo fey ngireek daw àq bés ba nu jëm
56. Am ngaafi ci “baatin” ba melnik gar te kaw ga lewet
Ba melni am xar Manjoon yow yaa nu làqu ba dem
57. Kiiraay yu tal yi nga làmboo tax mbindééf yi xamul
Say mbiir nde koon képp kuy nit sàku lool sa ngërëm
58. Ñaar fuk ak ñaar ci ay at moom la wuutu Isaa
“Samsul Huda” suux na dunyaa dellu waat ci lëndëm
59. Limal ma “samsul Huda” moodi am atam ca la dem
Manjoon a doon jant moom leeral na réew mi ba dem
60. Weeru Tabaski la tàggoo, neel “kasun” (27) ca la dem
Weer waak Manjoon àndandoo xéy làqu ñépp gëlëm
61. Bésul talaata ja Isaa Ruuhu Laaya jullee
Baay Laay la Isaa jullée Seydinaa Manjoon mi ka xam
62. Doom moodi meññatu baayam loolu moodi li am
Ku fonk baay deel teral doom koon nga jot ngërëmam
63. Ku rawle woon ci Manjoon jàppal xaliifa bi Seydinaa
Isaa koon di nay jot lul rëcoon na ba dem
64. Am nay ngénéél aki may loolu feñ na ca siyaarub
Yoof ba jëkk ci moom céy booba bés la ca am
65. Jullit ña ak taalibeek mbokkam ya ñépp taxaw
Ku nekk seede ne wii yoon tey la lii mosa am
66. Al Haaji Abilaaya jël diskuur di santa ku teew
Ak it jotat leen siyaar maanaa yu réy ya mu am
67. Ndax moo di njiital “dawaair” yi ak kurél yi te mooy
Loxel xaliifa bi neel “àqan” te moo di rakaam
68. Seydinaa Isaa yaatalal sa mbootu bul am i mbañ
Bul jël le ken parti, bootal ñépp ngir fa nu jëm
69. Ku fonk Yàlla bu doon ku ñakk it na la saf
Ku beew bu doon milyoneer it daw ko mook la mu am

70. Mujjuk ku beew moodi alku ak waaju wéeru ci moom
jàngal ma “walfajri” daa xam lii ba dootoo èlëm
71. Xam naa ni sax say jikkooy doylloo Boroom bi la moom
Man kay damay fàttaleek fek waane ndax te mu yam
72. Jàppal say rakk te bul mey yàxxakat ba mu aw
Ci seen digènte, na ñuy xam say nammeel yi nga am
73. Yàl na la Buur Yàlla dooleel kàntanal la ci yan
Bu réy bu diis bi nga xéy yor, jox la am ndimmēlam
74. Te xiir njaboot gi ci ak jub neexa boot baña juuyook
Ndigël yi fi Baay Laay bàyyi woon si kēram
75. Nan boole xol yi te gēm Baay Laay te jéf la mu wax
Ndax moom la Buur Yàlla doylloo jox ka ay ndigēlam
76. Mu ñëw te naa “ajibuu” Yàllaa ma yónni bu leen
Diijat na ngeen gēm te sellal ngeen dajeeek ngērēmam
77. Maay Mahdiyul Muntasar maay ndaw li Yàlla digóón
Mujjuk jamaana, ki neex muur, kooka mooy ki ma gēm
78. La am ca gaa ña ka jiitoon, daldi wàlli ci moom
ñii gēm ka ñaa weddi ñaay laamlaamle took baña dem
79. Buur Yàlla booleko ay “muhjisaat” yu di réy
Jàngal ma “Busral muhibiina” koon nga nangu waxam
80. Njiin daa na èf nit mu dib niw dootu xam lu di xew
Te saa yu èppée malaanam, waa ja dekki ndaxam
81. Mos na randal gééj ba dootul yàqa kër ga mu daa
Baawaan te lii wóór na mbooleem weddi ya ak ña ka gēm
82. Kerook la Baay Laay janook gééj naa ko jaam nga ni nun
Bul jeggi réddaw ndawal Buur Yàll cik dogalam
83. Ba gééj gi feese ba jub réddam wa dal di taxaw
Kerook ku teew bég na sàbbaal Yàlla dolli ngēmēm
84. Way wuuté yàgg na soow ci Mahdiyoo ki Isaa
ndax ñaari jëmm laam déét, ñaa nga naa du ñu am
85. Ñii naa xaliifab “banni” Abaas ba moodi Limaamul
Mahdiyu ñii ne ibnu al Asan la ñu gēm
86. Ibnul Asan Askarii ma suux ca kaaw ba la “siiha”
Gēm ni moodi Limaamul Mahdi mi wara am
87. Lii mat na “Hamsatu axwaalin” yu wuute ci feeñuk
Mahdiyuk i Isaa seetal “saraah” ya nga xam
88. Yéém naa ci wax yooyu waa jay wax ni Mahdiyu ak
Isaa amul, moom xanaa jàngul Adiis ya ñu xam

89. Yërël "sahiihul Buxaarii" daa ca gis mu di wax
Wàccuk Isaa fii ci dunyaa loolu moodi li am
90. Yonnenta nee saa yu Isaay ñëw du war ci gëléeem
Saraah ba nee koon saxaar ak woto yaa diy fasam
91. Mahdiyu moom Tirmiiziik Aakimu ak Tabaraani,
Ibnu maajaa, Abuu Daawda wax na ak dikkëm
92. Ak Mawsalii mooy Abuu Yaxlaa ku nekk di wax
Adiis yu ñëw ci dikuk Mahdiyu nee ma na am
93. Yërël bindub Ibnu xalduum koon te lii dina leer
Bul deeti réylu ba jomba laaji waaju di xam
94. "Alhamdu li Laahi iz kaana Limaamu lanaa"
Nuy santa Yàlla ci ay xéewël yu réy yi nu am
95. Nun nit ku ñuul war na noo sàntaat di sant di santa
Yàlla ngir mey na nuy jakleem defal na nu ndam
96. Ken xeebatul nit ku ñuul waxam ji tey ñu ngi kay
Binda aka jàng di yéem selluk xelam mi mu am
97. Ma jéeima teeral sa may wax waaye jéexul xanaa
Ma nopaloo-ndi te ñaan Buur Yàlla am ndimmëlám
98. "Wa salli yaa Rabbana" ci "Mustafaa karaman"
Jullil ci xayrul waraa ak saaba yaak ña ko gëm
99. Mu doon "salaatu" gu dul jéex ak "salaamu" gu dul
Yam boole kook soxna yaak mbooleem njaboot gi mu am